

ሀንዳ ካይሁዳ ታባኖ

ካይሁዳ ሀንዳ ካኮንጸፋመራ አማኒል አሌኖን ግራን አማኒ እን ሌንጉረን ካጣራ አጋልሰሰ ካአጋልሰሰሮ እባዶኮ አማኒል ሴርሰንያ። ሀንዳ ሮርሳኖይ ካላምክ ጴጥሮሳ እን ሂካ ካጋባባን ሀንዳ ካጸፈራ ካላም ታኮአዳሞት ዋ ጎሳን ኮይክ ካሰሰሮ አማኖ አታይ ጎሳአልራውን ኦናባባራን አሎ ሻድሳራ።

ራቶ ሂክ ማጻፋ ካአበራ

ታባኖ 1-2

ጣራ ኦአጋልሰሰራንኮክ አጋልሰሰ፣ ያዳሊና ኢያኖ 3-16

አማኖ ጎሳኦራናውን ካሰሰመሮ ጎርሳ 17-23

ሶማ 24-25

1 የሱሳ ክርሰቶሳን ካሀንዳሮና ካያይቆባ አቢ ይሁዳ፣ ዋ ኦዶይ ኦኔላንቴታና የሱሳ ክርሰቶሳ ኡማንቴዴን ኦኦራንቴታን ዱባን፣

2 ሻጋ፣ ኖጎዳና ጌላንጀ እሰኑን ሀጂናቶ።

ጣራ ኦአጋልሰሰራንኮት ሙርት

3 ኦኔላታሮ ኦቴ፤ ራቶክ ፋይናካንውን እሰኑን ጸፊን አሎ ዶታ ግረ፤ ግዳ ጎአመን ካአባባኖን ራድ ዋ ጎሳን ኮክ ካሰሰሮ አማኖ አታይ ዋ ጎሳአባታኑን ጎርሲን እን እሰኑን ጎሳጸፊሮን ካሂሶን ሌ።

4 ጎራታ ካሞጋንኮ ሆረን ህታ ሙርቲን ካጸፋመራ ኮኮ እባዶ ሉቄ እሰን ቶሰ ታበራ፤ እሶና ኦብሰ ታዋ ካላይኒዕ፣ ዋ ሄዶካንት ሰኖ ባቲክ እያናይ ኦኢግልሳራና ኡሱ ካላል ዱባንኮ ካንጂንክ፣ ሞትካንና ጎታካን ካሌሮ የሱሳ ክርሰቶሳ ኦካካታራንያን።

5 ሂካ ዱባ ጣይቲኒ ኮይክ ካአዴሰታን ጎሌና፣ ጎታ ጎሳኬሳ ካግብጽ ኡልኮ ቤሰረ ጎሳሃሰሮና ኦአማኖን ግራን ሃር አባባተረ አደ ጎሳባሰሮ እን እሰን ሻድሲን ዶታራ።

6 ኡሱማሊና ጂንናትሶ ኦራታናዋቲ ካሄሰሮ ኤርግቻል ሻዳ፤ ዋ እሶ ታፍርዳ አሪ ታጌቶ ጅሩ ጅሮማክ ሻኖይና፣ ጢልንጋክ ሙጉዲ ኦሮ አዳላይሰራ።

7 ሂካማሌ ሶዶሚና ጋሞራይ፣ አደ ጎሶብክሶይ ካግራ ካታማል ሻርሙጡማን ካጃራሮ ሌ፤ ሴራኮ ሳር ቤረን

1:1 ማቶ. 13:55፤ ማር. 6:3። 1:5 ብያ. 12:51፤ ቶቶ 14:29-30።

እስእስኑሮ ሻርሙጡማ ፈለን፤ ሃንሱን እሶ ጅሩ ጅሮማት ኤሊኒ ኦሙርሳማራኑን ማሱሳ ሌን።

8 ኡሱማለና ሂክ እባዶ ሀስሎኦትሶ ካሰጋራን ራድ ሰሴታ እስኦትሶ ባቶይሳታራን፤ ኦድናት ኦክባና ኔባታራን፤ ዳሩሪ ካባጃ ኦክባና ሀባራራን።

9 ኤርግቻሉን ዎይቻ ካሌራ ሞካኤል አደ ሬስ ካሙሴ ማራን ዱርሳነ ዎታ ደጋማግራን፡ “ጎታ ሀሃድሶ” አመራ ኳሬ ላኮሀባረሮ።

10 ሂክ እባዶ አደ እሶን ካኦዳሳሞን አየሰ ዱባ ሀባራራን፤ ሳሙ ካላይክ ግድ አን ጎጎመጣመኒ ካካሳን አየሰ ባራን።

11 አኔ እሶን! ራ ካቃዬል ሰተራን፤ ማራጋዴን ጋጲጋጳ ሸሬና ታባላሚ እዬራን፤ ሜላነ ታቆረይ ባየራን።

12 ሂኒዕ እባዶጃ ካጌላንጃ አሞክሰን ጉት ሙላ ኮና ካላይ እሰኔ ዎታ ጋባላሜረን ኦኦማራን ሳልናጃልያን፤ አደ እስኦትሶ ኦላሉን ኦኦማራንያን፤ እሶና አሞባሊ ካዎዳማሮ ኡዳሞ ካላይክ ዱማንቻልያን፤ ዉጣ ታኮኩኩአማሮ ድግኒ ኢል ካኮሄላሞን ሀዲድኮ ታጋመረ ላማ ጋለ ካኦንጋጋ ጋ አንያ።

13 ኦሙልሳራን ፈሎኦትሶይ ሳንባ ኦጉዳራን፡ ጎሜላን ካከያሮ ጋሽማሎ አንያን፤ ጢልንጋክ ሙጉድ ጅሩ ጅሮማን እሶ ካኦራታሮና፡ አዳ. ካካፋፋሮ ባራጃልያን።

14 አደመኮ ሀጋእበረ አላታን ታቶዶብ ካሌራ ሄኖክ አዬሳ “ሂክማ ዎ ቶታም ካሄሌላሞን ቁሉክ ኤርግቻልኬሳነ ዎታ ሌረ ዱባ ጉት ሙርቴሰን ኤመይናራ፤

15 ሀሱ ዎ ካሄደይሳኖን እባዶ ካፈለሮ ካሜላን አዬሰኮት አላንቲ ሙርሰናራ፡ ዋና ሩሞና ሂናኦ ኡሱ ኦሄደይሳኖን ጨባልዬል ካኦዬሰራን ካሜላን አየሰ ዱባ እሶ ፍርድናራ” አመራ።

16 ሂክ እባዶ አርጌቶ ኦጉንጉማራና ማሞሰክ አዬሲና ኦገገላኖንያን፤ ካሜላን ራክሶይ ሀልቻ ኦሰሴታራንያን፤ ሀኢትሶ ካኮራ አዬሲ ታኦማጋንተታ፡ ላኦትሶ ደታታ እባዶ ሶሶባራን።

ሴርሳኖና ጎርሳ

17 እየሱን ጎአመን ኦጌላታሮ ኦቴ፡ ጎታካን የሱሳ ክርሰቶሳ ኦፋራሜረን ሂታኮ ሆረነ ካኦዬሰራን ሃፋራ ሻዳ።

1:7 መጣ 19:1-24። 1:9 ዳኔ. 10:13፣21፤ ዳኔ. 12:1፤ ራጋ 12:7፤ እዲ. 34:6፤ ዛኪ. 3:2። 1:11 መጣ 4:3-8፤ ቶቶ 22:1-35፤ 16:1-35። 1:14 መጣ 5:18፣21-24።

18 እሱ “ካጋኞ ጌሲ ፈኢ ታዋኮ ኦፋክመራን እሰኦትሶ ሀልቻ ካሜላን ኦሰሴታራን ኦቃጭፋታራን ኤሜይናራን” አመን እሰኩን ሰጌረን።

19 እሱ እባዶ እባዶኮ ኦአሳባራን፣ ካሶዩ ሀልቻ ኦፈላራን፣ አያና ቁሉክ ካላይኒዕ እባዶያን።

20 ኦጌላታሮ ኦቴ እሰን አዳ፣ ካካለኮና ካቁሎዩ አማኖክሰኒ እሰኦትሰን ቁሎይሳዪን አታዬን፤ አያና ቁሉክኮክ ሁና አሎ ኤባዩን።

21 ጎታካን የሱሳ ክርሰቶሳና ሻጋኬሳይ ጅሩ ጅሮማክ ግር ቶሰ እሰን ጎጎጌግሰር ኦራታ እሰኦትሰን ጌላንጀ ታዋይ ኦሮ ኦራዬን።

22 ካሄዳታሮ እባዶን ነኔኤይሳዬን፤

23 እባዶ ኮኮ ኤሌንኮ ቤሳዴን ሃሳ፤ ካካለቱን አብሲ ነኔኤይሳዬን፤ ጎሌና ጩሶ ካባቶዩሮ ማርክሶ ካድነ ሳርሰ ዱባ ሀሄሶን ዲዳ።

ካጋላታ ኤብ

24 እሰን ጎጎኢኖንኮ የልና ቱፍ ካላይኒዕ የልረ ገጌሎይ ካባጃቱሳ ሆረ እሰን አሊሰን ካዳንዳሮ፣

25 ኡሱ ካላሊ ደብካን ካሌሮ ሄዶ፣ ጎታካን የሱሳ ክርሰቶሳክ ጋራነ ሆርኮሰኮ ካየረ፣ ግዳና፣ ጅሩ ጅሮማን ካባጃና ጋሻና፣ ሁናና ኦዶናትና ኡሱን ሀሌዎ! ሀሚኒዕ።

አማኞ ኦኡሱብ

Baiso: አማኞ ኦኡሱብ (New Testament)

copyright © 2024 The Word for the World International

Language: Bayso (Baiso)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-30

PDF generated using Haiola and XeLaTeX on 29 Apr 2025 from source files dated 30 Apr 2025

972904ca-388a-50c8-bfa0-5ee59e8b889e